



KOPI PAHIT

Dahulu di dewan-dewan permesyuaratan di Indonesia, bahasa Indonesia (Melayu) tidak dibenarkan digunakan di majlis-majlis mesyuarat municipal dan dewan-dewan yang di atasnya tetapi yang demikian telah dipecahkan oleh al-Marhum Muhammed Husnī Tamrīn dengan beliau sendiri tidak mau memberi ucapan selain daripada menggunakan bahasa Indonesia.

Kita di Semenanjung sekarang telah hampir menghadapi pilihan-pilihan raya Federal dan kerana pilihan-pilihan raya itulah Tengku Abdul Rahman Yang di-Pertua Agung UMNO se-Malaya (Pertubuhan Kebangsaan) mengesyorkan supaya orang-orang UMNO mencalonkan wakil-wakilnya hanya daripada orang-orang yang tahu berbahasa Inggeris – yang tidak tahu berbahasa Inggeris janganlah dicalonkan. Harus perkara ini diasaskan oleh kerana memandang bahasa di majlis itu bahasa Inggeris sedang bahasa Melayu yang kedua.

Fikiran ini dibantah dengan keras oleh ahli-ahli UMNO sendiri di persidangannya di Pulau Pinang itu dan sebahagian daripada orang-orang luar memandang bahawa langkah memperjuangkan cita-cita Melayu dikatakan mereka undur selangkah.

Apakah tidak semoleknya kalau perwakilan-perwakilan UMNO di majlis mesyuarat federal itu dari sekarang hanya menggunakan bahasa Melayu sahaja – tidak bahasa Inggeris, untuk memuliakan sendiri?

* * *

Terbit daripada seorang gadis lari dari rumah ibu bapanya kerana sukakan seorang lelaki lain dan berlindung di rumah Che' Zahrah binti Nür Muhammad, Yang di-Pertua Persekutuan Kebajikan perempuan-perempuan Melayu Singapura di Diskar Rod maka adalah dikatakan perkara pertubuhan

itu sedang disiasat adakah ia sah sebagai sebuah pertubuhan atau tidak. Sebab-sebabnya sebagaimana juga kita pernah mendengar bahawa pertubuhan itu tidak pernah bermesyuarat agung untuk melantik ahli-ahli jawatankuasa yang baru bagi tiap-tiap tahu sebagaimana yang dibuat oleh pertubuhan-pertubuhan lain.

Di sebalik itu berita-berita yang kerap kali tersiar adalah ia, di rumahnya di Diskar Rod, mengadakan tumpangan-tumpangan kepada orang-orang, khasnya gadis-gadis atau orang-orang yang keluar dari rumahnya bagi diikhtiarkan “jodohnya” supaya ia terselamat sedang kawasan tempat tinggalnya itu adalah kawasan “tempat pelacuran” yang tidak aman sebagaimana yang dikatakan oleh pengelola badan kebajikan masyarakat Singapura.

Seenarnya perkara ini sepatutnya dari dahulu diselidiki. Kita berapa lama tidak mau mengungkit-ungkit kerana takut kita dituduh sengaja mencari lawan tetapi sekarang perkara itu tidak boleh dicuaikan lagi supaya tidak terjadi keadaan-keadaan yang tidak digemari akan berlaku di dalam kawasan yang dikatakan banyak menjadi contoh itu.

* * *

Dalam bulan Safar ini banyak cerita-cerita tersiar dan terhebah menyatakan bahawa gadis-gadis yang baharu naik lari mengikut lelaki kecintaannya sendiri sehingga ibu bapa pusing kepala.

Kejadian ini tidak lain sebabnya kerana terlampau memberi kebebasan kepada gadis-gadis itu, malam berjalan seorang diri kerana bersekolah, habis sekolah balik bersama-sama dan akhirnya bercengkerama lalu masuk hama dan kesudahan lari bersama – tidak mengendahkan lagi adat istiadat yang lama dan agama.

Wal hasil jika hendak dicari salahnya tentulah kepada ibu bapa sendiri – kepada rumahtangga sendiri yang tidak dapat menyusun dan mengatur kesejahteraannya supaya anak-anak hormat dan memuliakan ibu dan ayahnya. – Cemeti al-Farouk.